

Directora di Biblioteca Nacional, Astrid Britten

Biblioteca na Playa lo traha riba mehoracion di servicio y recuperacion di publico

ORANJESTAD - Algun dia pasa un grupo di bibliotecaria a bishita biblioteca na G. Madurostraat pa wak con ta bayendo cu e trabou di renobacion di e edificio principal. Nan ta contento cu e proyecto ta den su fase final. E compania BOHAMA ta entrega e edificio dentro di poco. Despues por cuminsa muda, reorganisa y drecha e interior. E renobacion a tuma hopi tempo pa diferente motibo. Entre otro, e proceso di destaho a tuma basta tempo. Si tene na cuenta cu biblioteca na Playa a sera dia 9 di september 2010.

"E servicio na publico na Playa pa e motibo aki a bira menos y den e dianan nos dilanti mester recupera esaki pa bay bek na e nivel di prome y hasta nos kier mehoire. Nos lo dedica nos mes completamente pa hiba e servicio bek riba un

bon nivel y organisa tur cos bon pa e operacion cana manera e mester ta dentro di poco tempo. No tabata facil pa e usuarionan ni pa nos empleadonan. E usuarionan a comenta hopi biaha den e ultimo aña cu nan ta haya hopi duele cu biblioteca na Playa ta sera" ta e comentario di e directora Astrid Britten.

SERVICIO

Den e ultimo aña y mey a logra mantene e servicio parcialmente riba pia pa medio di e sucursal na San Nicolas y Departamento Arubiana na Bachstraat. A realoca personal pa algun biblioteca escolar por ehempel na Colegio Arubano. Pero tabata un periodo cu mester a cambia e manera di ofrece servicio. No por a ofrece tur e espacio, tanto publico como empleado mester a casi sinta riba otro, por ehempel. Esey tabata un di

e obstaculonan. E coleccion di buki pa adulto a bay den un deposito. Aki e coleccion a daña bastante dor di calor, insecto, humedad y stof y otro factornan. Un parti di e coleccion no ta presentabel mas y mester saca esaki for di circulacion. Minister di Enseñansa a pone un suma extra disponibel pa cumpra buki nobo e aña aki.

FUTURO

"Nos ta cuminsa muda dentro di poco y ta spera pa ta den ful operacion regular na augustus, kisas mas prome. Nos ta organisa diferente reunion cu bibliotecaria y empleadonan y otro partidonan pa percursu pa tur cos bay bon organisa y segun plan" asina Britten ta informa. "Pa pone extra atencion riba biblioteca su reapertura nos ta trahando riba un calendario di even-



Directora di Biblioteca Nacional, Astrid Britten

to pa ofrece cada siman algo special pa e publico". Un programa atractivo cu lo presenta den e ultimo lunanan di 2012. Ya a cuminsa cu e organizacion di festival di buki pa mucha unda 20 autor y ilustrador lo participa. Na 2012 ta celebra e di 20 edicion di e festival popular aki.

Gobierno tin plan pa construccion y organizacion di facilidadnan multifuncional den diferente bario. Mayoria ta bin como anexo na e hulpbestuur-skantoor nan existente, otronan lo establece den edificionan renoba. E facilidadnan multiculturalnan aki lo ofrece servicio di biblioteca tambe manera prestamo di buki, sala di estudio y uso di computer cu Internet. Esey ta un desaroyo positivo pa trabou di biblioteca na Aruba. Si tur cos bay bon e prome ta habri na Noord cuminsamento di otro aña, despues e otro districtonan ta sigui." □